

Dibsho ni Inpaspasing nonta ira Apostol (ACTS)

Lessons Para iren Anak

LESSON 5

Bible Story: Sota Spirito Santo i engi-kan ni toled son Peter nen John.

Scripture: [Acts 4:1-31](#)

Learning Goal: *Amtaen ni anak ey sota Ispirit Santo i mengi-kan ni toled so ni san-eskey ya emati say baalan shen ipa-sas shi eshom si Jesus shi biyag sha.*

Bible Lesson: Sota Ispirit Santo i mengi-kan ni toled.

Review Questions:

1. Ngantoy nem sha kaitoltolod sota epilay shi timplo? (Say en manpalpalimos)
2. Nganton oras i kaidaw ira nen Peter nen John shi timplo? (alas-tris ni mamashem)
3. Ngantoy nem ira kaendaw shi timplo no alas-tris? (say mankararag)
4. Ngantoy inkowan nen Peter so nonta epilay? (Acts 3:6)
5. Ngantoy inpasing nonta epilay jen naagasan? (khavol ni panakabalin nen Apo Jesus)
6. Ngantoy dingkha nonta epilay nonta inpan-akad nen Apo Shiyos? (eman-ekaekad tan eman-ab-abtok ni iyaman to son Apo Shiyos.)
7. Ngantoy inkowan nen Peter so nonta ira totoo ja dag-en sha say mepakawanan i basol sha? (Manbebawi ira, jet si Apo Shiyos ma i kemangen sha)

[Give any student a Bible who did not bring one. It is important for each student to be able to see with their own eyes the passage of Scripture being taught to them. By instilling this each week we are praying that the students will not just accept what people say about God and His Word, but they are given the tools to see for themselves exactly what God's Word says.]

Introduction:

Okdag joy Biblia jo shi Acts 4. Shiya chapter 4 i toloy nonta istorya ja inashal tayo nonta sakey den Domingko. Sota ira totoo, ira emeshaaw isonga naolnong ira nodta dogad ja epasamakan nonta milagro. Jet si Peter nen John, inkowan sha so nonta ira totoo ey say khavol la nan-akaran nonta epilay ya daki ket khavol ni ngaran nen Jesus ja pinatira.

A. Bimanonget sota ira pangolo ni Hodiyos son Peter tan son John.

No eman-obda si Apo Shiyos so nonta ira totoo, kakontra-a ngo nonta kalaban To. Sipa sota kalaban nen Apo Shiyo? Si Satanas. Assen tayo niman no ngantoy dag-en ira nonta makakontra son Apo Shiyos son Peter tan son John. *Basaen tayoy 4:1-2.*

Amtayo ira sota kowan sha ey pangolo ni religion? (Sajay iren pangolo ni religion, eg sha patien si Jesus jen Shiyos Anak, isonga inkoros sha Si-khato.) Si-khara sota ira papashi ni Hodiyos tan sota ira Sadducees. Say metanshaanan tayo no sipa ira sota Sadducees, si-khara sota eg sha patien jen say too ket wara di i timpon man-ongal manipod shi patey.

No maytosho i Esel nen Apo Shiyos, wara iray mengontra. Inges toy dingkha niyay ira jen papashi ni Hodiyos tan sota ira Sadducees, ira kaemanbonget nonta intenengan shay kepan-itoro nen Peter nen John. Ngantoy ngata nem ira emanbonget? (*Seked moy songbat ira nonta anak.*) Owen! Say sakey ya dason no apay nga bimonget ira, kowan sha emo ey nonta binonora si Jesus, ayshi mala Si-khato. Nem si Jesus, nan-ongal mowan. Si Jesus, ayshi i to panteposan, wara ni olay ta Shiyos Si-khaton sibibiyag. Sakey pay ya bimongetan sha ket sota inkowan shen man-ongal iray nanketey. Sotan eshan ira Sadducees, eg sha patien jen waray timpon manbiyag mowan iray nanketey.

Si Satanas jen makakontra son Apo Shiyos, pan-iparas jen osalen ira iya pangolo ni religion jen pesalsheng sha sota emankaitoron Mapteng nga Shamag, ja si Jesus etey shi koros, naydiyang nem nan-ongal nonta maykatdon akhew. Amta nen Satanas jen no mematiy too son Jesus, eg ira meshosa, isonga ngaaw ton maytosho sota dingkha nen Jesus. Ngaaw ton say too ket eg meshosa khavol ni basol to.

B. Naybalod si Peter nen John khavol ta intoro shay maypangkhep son Jesus.

Basaen tayoy verse 3

Inshel nonta ira pangolo ni religion si Peter nen John say pebistigal sha ira. Nem agsipod ta emankedabi, sota ira pangolo ni religion inpaibalod sha nin ira si Peter nen John shi badoran say no kabasan to bistigalen sha ira. Jet nontan met lang, sajay iren papangolo tan papashi ni Hodiyo, nanplano ira no ngantoy pesing shen mengipasalsheng son Peter tan John shi sha kepengitostosho ni maypangkhep son Jesus.

Say emati, eshakil iray digat ta sha keda-kami shi sha keionod ni piyan nen Jesus, nem sota Ispirito Santo nen Apo Shiyos ja eman-iyen son si-khara i mengikhan ni toled tan kedsang sha angkhen shi timpon digat. ([John 15:20](#), [1 Peter 4:12-16](#), [2 Timothy 3:12](#))

C. Eshakil iray emati so nonta intoro nen ira Peter maypangkhep son Jesus.

Basaen tayoy verse 4.

Angkhen wara iray kimontra nodta toro iren Peter, wara ngo iray engitneng so. Sota ira totoon naolnong nodta awas ni timplo ket inon-an shay kaskashaaw wa milagron epasamak, intenengan shay inpasing nen Peter jen nantoro ja waray daing to tan toled to shi panakabalin ni Ispirito Santo. Sota Ispirito Santo i engi-kan ni itoro to - sota Mapteng nga Shamag, jet no sipa man i manbebawi nodta ira basbasol sha tan memati son Jesus, eg ira meshosa. Shiya verse four, kowan to ey eshakil iray ematin totoo nontan na akhew. Mageno jen imanshekel iray emati, jet say bilang ni emin na ematin daleki ket 5 thousand, nem nontan na akhew ke 2 thousand i emati. Say dingkha ira niyay ya totoo nonta intenengan shay toro maypangkhep ni Esel Apo Shiyos ket emati ira.

D. Simango si Peter nen John so nonta ira toray ni Hodiyo.

Basaen tayoy Acts 4:7

Nonta kabasan to ni inkaybalod sod Peter nen John, insango sha ira nodta toray ni Hodiyo. Jet sinalodsod sha ira. Ngantoy insalodsod sha son si-khara? "Sipen ngaran i inngandan jo nontan?" Ayshi i toled nen Peter jen songbatan i salodsod nonta ira pangolo ni religion no ayshi son si-khato sota Ispirito Santo. Inon-an nen Peter i inpasing nonta ira pangolo ni religion jen iengikoros son Apo Jesus ta in-oges sha Si-khato. Jet niman na simango si Peter son si-khara, sigoradon ontakot si-khato, no ayshi son si-khato i Ispirito Santo nen Apo Shiyos. *Basaen tayoy, songbat nen Peter so nonta ira toray tan pangolo ni Israel, shiya verse 8-12.*

Shiya verse 12 kowan to ey, "Enshiy eshom ma ngaran (too) ja kaysedakanan ni too ja inbetkhag ali nen Apo Shiyos ja mengisedakan, nem eg si Jesus bengat."

Ngantoy nem importanti sota ngaran jen Jesus shiya Biblia? Sajay jen si Jesus bengat i rimidjo say sota ira totoo ket maysedakan ira. No itenengan tayoy ngaran jen Jesus shiya Biblia, say piyan To iren esden ket Holy-Ayshi i basol to, Emalsowa ni dangit tan shaga, Manakabalin, Kangatoan, ayshi i khapoan To tan pengintegangan To, Masmek tan Mengisedakan. No itenengan tayoy ngaran na Jesus ket sajay iray kaondaw shi nemnem tayoy. Si Apo Jesus, Shiyos Si-khato, isonga emin na itsora nen Apo Shiyos wara son Si-khato.

Manakabalin si Apo Jesus, ta Shiyos Si-khato. Si-khato bengat i Mengisedakan so ni emin na totoo shi shosa ni basbasol sha. Manakabalin sota ngaran na Jesus shiya Biblia. Nan-akad sota epilay, khavol ni panakabalin nen Jesus.

Nonta emekitabtabal si Peter so nonta ira pangolo ni religion, inon-an shay kinatoled ira nen Peter tan John. Amtara jen si Peter nen John ket ebaba bengat i kasesaad sha. Nem agsipod ta wara son si-khara sota Ispirito Santo, timoled tan binaalan shen nantoro tan simango so ira nonta papangolo. Inon-an ira nonta pangolo jen waray naydasinan sha, isonga nasshaaw ira et ninemnem shen si Peter nen John ket nay-ol-olop ira son Jesus nontan.

No asen shakito ngata ni eshom, maidasin sha ngaten waray toled ono si-met tayo shi tolong ni Ispirito Santo ja wara son si-khatejo tan ma-sas sha ngaten epodno kito son Apo Shiyos? No emati kito, wara komay naydasinan tayo tep wara kito son Jesus. Ma-sas sha koma sota itsora nen Jesus shi biyag tayo.

Eg khinostoan nonta ira papangolo sota inkowan nen Peter nen John, isonga inpaejah sha mowan ira jet binidin sha iren kowan sha ey, “Niman ma, kenshat ta ibi-jag jon mengitosho ono mengikowan shi totoo ni maypangkhep nonta jo kaitorotoro!”

E. Pinidi nen Peter tan John na pasien si Jesus ey sota ira papangolo.

Niman, asen tayo no pinati ira nen Peter nen John sota ira papangolo. *Basaen tayoy verse 19 tan 20.* Pinati ngata nen Peter tan si John sota bilin nonta ira pangolo ni religion? Ayshi! Say pinatira ket sota inbilin nen Jesus, sota inbilin To son si-khara ja kowan To ey, “daw kayo shi emin na ili shiya dobong, jet itoshoyo i maypangkhep son si-khak say memati ira”.

Ngantoy inkowan nen Peter nen John so nonta ira pangolo? “...Sota inon-an mi tan intenengan mi son Jesus, kenshat ta eg mebedin na isalsheng min mengikowan shi totoo.” Jet sota ira pangolo binidin sha mowan iren shili asan sha ira ibodos shi badoran.

Nonta kepan-osala nonta kalaban nen Apo sota ira pangolo ni religion jen sha kepanpesalsheng si Peter nen John na mengitosho ni Mapteng nga Shamag, assen tayo no ngantoy dingkha nonta ira totoon nang-sas nonta milagro. *Waray manbasa ni verse 21-22.*

Waray importanti jen ma-sas tayo shiyay ya verses: Sota Ispirito Santo, nan-obda shi biyag nen Peter tan John ja Si-khato i khavol la sota ira totoo ket nan-iyamanan sha si Apo Shiyos ja aliven si Peter nen John. Si Apo Shiyos i engipa-sas ni panakabalin To shi biyag nen Peter tan John. Ebadeg jen kamali sha no say shinejaw sha ket si Peter nen John nonta naagasan sota epilay. Sota ira mansilbi son Jesus, si Apo Shiyos ni olay i pengi-kanan sha ni shayaw ira nodta sha kedagdag-a.

Jet nonta naybolos si Peter nen John, nay-oli iren shagos nodta kad-an ni kagajem sha jet inkowan sha son si-khara i emin na dingkha ira nonta apo ni papashi tan sota eshom ma pangolo ni Hodiyos son si-khara.

Sotan ira emati nonta intengan sha sota epasamak son Peter nen John na naybalod, nanriri ngata ira tan bimonget ngata ira? Agsipod ta wara son si-khara sota Ispirito Santo, eg ira bimonget ono nanriri no diket say dingkara, nankararag ira tan inshayaw sha si Apo Shiyos. *Verse 24.*

Intenengan nen Apo Shiyos i kararag tan shayaw ira nonta emati et waray kaskasshaaw wa epasamak son si-khara. *Basaen tayoy Acts 4:31.* Jet idi naksheng nga nankararag ira son Apo Shiyos, khimiwed sota baley ya esa-nopan sha, jet emin ira, enshalan ira ni Ispirito Santo jet etoled ma ira ja mengikowan ni Esel nen Apo Shiyos.

Conclusion:

Kaskasshaaw iyay jen istorya, inon-an tayon sota Ispirito Santo nen Apo Shiyos i mengi-kan ni toled tan si-met ira ni emati ja mengikowan ni Mapteng nga Shamag. No sakey kayon emati son Jesus, wara met laeng son si-khayo sota Ispirito Santo say waray kabaalan jon ontongpal son Jesus tan

mengibingay ni Mapteng nga Shamag. Isonga mebedin jon etod-an iray tatang tan nanang jo ja eg pay laeng nin emati, tan aakhiyo, khagajem jo tan eshom pay.

Close in prayer

Pray for those who have not believers in Jesus yet. Pray for the children who have been saved to allow the Holy Spirit to give them power to live a life that pleases God.

Memory Verse: 2 Timothy 1:7: “For God did not give us a spirit of timidity, but a spirit of power, of love and of self-discipline.”

Review:

1. Sipa sota makaasneng ni kepan-obda nen Apo Shiyos shi biyag ni sakey ya too? (Si Satanas)
2. Ngantoy nem inbalod sha si Peter nen John? (khavol ta intoro shay maypangkhep son Jesus)
3. Piga i emati ni Mapteng nga Shamag nontan na akhew? (2 thousand)
4. Nganton ngaran i inkowan nen ira Peter tan John so nonta ira pangolo ni religion na inkowan shen naagasan nonta epilay? (Ngaran nen Jesus)
5. Nganto sota inbilin nonta ira pangolo ni religion son Peter nen John na isalsheng shen itoro shi eshom? (Isalsheng shen ikowan ono itoro i ngaran na Jesus)
6. Sipa sota inkowan nen Peter tan John na pasien?
7. Ngantoy dingkha nonta ira emati nonta intenengan shay epasamak son Peter nen John? (Nankararag ira tan inshayaw sha si Apo Shiyos)
8. Ngantoy dingkha nen Apo Shiyos ja pengipa-sas To ey intenengan Toy shawat ira nonta emati?
9. How did God answer their prayer? (Nanjegjeg, tan enshalan ira ni Ispirito Santo et ewad-an ira ni toled ja mengikowan ni Esel nen Apo Shiyos)